

Na osnovu člana 16. stav 2. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj: 7/10) i člana 11. stav 2. Zakona o koncesijama Zeničko-dobojskog kantona-Prečišćeni tekst ("Službene novine Zeničko-dobojskog kantona", broj: 5/03) i, na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 91. sjednici, održanoj dana 23.03.2017. godine, d o n o s i

O D L U K U

o dodjeli koncesije za korištenje prirodne izvorske vode sa izvorišta „Radakovica“, MZ Gornja Borovica u općini Vareš

Član 1.

(Predmet)

Privrednom društvu "KRALJEVSKA" d.o.o. Sarajevo (u daljem tekstu Koncesionar) dodjeljuje se koncesija za korištenje prirodne izvorske vode sa izvorišta "Radakovica", koje se nalazi na području MZ Gornja Borovica, općina Vareš, u količini od 0,50 l/s.

Član 2.

(Studija o ekonomskoj opravdanosti)

Daje se saglasnost na „Studiju o ekonomskoj opravdanosti izgradnje punionice vode „Kraljevska“ Gornja Borovica“ od jula 2016. godine.

Član 3.

(Vrijeme trajanja koncesije)

Koncesija za korištenje izvorišta iz člana 1. ove Odluke je 30 (slovima: trideset) godina, računajući od početka korištenja izvorišta, a najkasnije u roku od tri godine od donošenja ove Odluke.

Član 4.

(Plaćanje tekuće koncesione naknade)

(1) Koncesionar je dužan da plaća naknadu za korištenje koncesije po ovoj Odluci u visini, na način i po postupku i rokovima koji će se utvrditi Ugovorom o koncesiji.

(2) Za vrijeme trajanja koncesije korisnik koncesije je obavezan da plaća tekuću koncesionu naknadu u visini od 1,561 % od ukupnog prihoda ostvarenog korištenjem koncesije, odnosno najmanje 5.500,00 KM (slovima: pethiljadapetstotina konvertibilnih maraka).

Član 5.

(Plaćanje jednokratne koncesione naknade)

Koncesionar je dužan uplatiti jednokratnu koncesionu naknadu u iznosu od 16.108,00 KM (slovima: šesnaesthiljadastotinu osam konvertibilnih maraka), prije potpisivanja ugovora o koncesiji.

Član 6.

(Raspodjela koncesione naknade)

Naknade iz članova 4. i 5. ove Odluke predstavljaju prihod Zeničko-dobojskog kantona i općine Vareš u omjeru koji je određen Odlukom Vlade Zeničko-dobojskog kantona o načinu raspodjele i korištenju finansijskih sredstava prikupljenih po osnovu kontinuirane i jednokratne naknade od koncesija ("Službene novine Zeničko-dobojskog kantona", broj: 1/13).

Član 7.

(Posebna vodna naknada)

Plaćanje naknade za korištenje koncesije za MHE ne isključuje obavezu Koncesionara da plaća posebnu vodnu naknadu za korištenje voda u skladu sa Zakonom o vodama, odnosno u skladu sa vodnom dozvolom.

Član 8.

(Zaključivanje ugovora o koncesiji)

(1) Zadužuje se Ministarstvo za poljoprivredu, šumarstvo i vodoprivredu da u svojstvu Koncesora, na osnovu ove Odluke i odredaba Zakona o koncesijama, zaključi Ugovor o koncesiji sa Koncesionarom, kojim će se urediti međusobni odnosi, prava, obaveze i odgovornosti, uz prethodno pribavljeno mišljenje Kantonalnog pravobranilaštva.

(2) Koncesionar je dužan prije potpisivanja Ugovora o koncesiji, a najkasnije u roku od tri godine od donošenja ove Odluke, obezbijediti odobrenje za građenje objekata u funkciji korištenja predmeta koncesije.

(3) Ugovor o koncesiji iz prethodnog člana mora sadržavati obavezu Koncesionara da prilikom izgradnje objekta angažuje 100 % domaćih privrednih društava u izvođenju radova.

Član 9.

(Stupanje na snagu odluke o dodjeli koncesije)

Ova odluka stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02- 25-4124 /17.

Datum, 23.03.2017. godine

Zenica

PREMIJER

Miralem Galijašević

DOSTAVLJENO:

1x Ministarstvo za poljoprivredu, šumarstvo i vodoprivredu,

1x Ministarstvo finansija,

1x “KRALJEVSKA” d.o.o. Sarajevo, putem Ministarstva,

1x Općina Vareš, putem ministarstva,

1x „Službene novine Zeničko-dobojskog kantona“,

1x a/a.